



Sud Bosne i Hercegovine
Суд Босне и Херцеговине

Broj; S1 3 Iž 039614 21 Iž
Sarajevo; 26.01.2021.godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi Srpske demokratske stranke Opštinski odbor Doboj koju zastupa povjerenik Janković Rade, izjavljene na odluku Centralne izborne komisije Bosne i Hercegovine broj: 05-1-07-1-96/21 od 21.01.2021. godine, o poništavanju izbora održanih 15.11.2020. godine na 89 redovnih biračkih mjesta u izbornoj jedinici Doboj, na nejavnoj sjednici održanoj 26.01.2021. godine donio je

R J E Š E N J E

Žalba se odbacuje kao nedozvoljena.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, poništeni su izbori održani 15.11.2020. godine na taksativno navedenih 89 redovnih biračkih mjesta u izbornoj jedinici Doboj za nivo gradonačelnika Grada Doboja i Skupštinu Grada Doboja, te je odlučeno da će se nakon pravosnažnosti odluke, donijeti odluka o raspisivanju ponovnih izbora.

Ovu odluku pobija Opštinski odbor Doboj političkog subjekta Srpske demokratske stranke sa prijedlogom da se ožalbena odluka ukine ili poništi, naloži Centralnoj izbornoj komisiji BiH da poništi izbore na svim biračkim mjestima u izbornoj jedinici Doboj, utvrdi postojanje elementa krivičnog djela u vezi sa povredama izbornih pravila i izrekne mjere zabrane vršenja funkcije u izbornoj administraciji svim učesnicima u izbornom procesu.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da je žalba izjavljena od neovlaštenog lica i predložila da se odbaci kao nedopuštena ili odbije uz navođenje razloga neosnovanosti žalbenih navoda.

Žalba je nedopuštena.

Prema odredbi člana 6.2 stav 1 Izbornog zakona (Sl. glasnik BiH 23/01 sa izmjenama) zaštita prava uspostavljenih tim zakonom pripada političkom subjektu u čije ime, shodno članu 6.3 stav 1, prigovor potpisuje predsjednik ili ovlašteni predstavnik političke stranke.

Zakon o upravnom sporu BiH, čije se odredbe primjenjuju u postupku po izbornim žalbama, u članu 80 stav 1 propisuju da žalbu potpisuje predsjednik ili ovlašteni predstavnik političke stranke.

Uputstvo o procedurama za rješavanje o prigovorima i žalbama podnesenim izbornim komisijama (Sl. glasnik BiH br. 25/20) u članu 5 stav 1 propisuje da se potpis ovlaštenih predstavnika mora nalaziti na obrascu deponovanih potpisa za podnošenje prigovora i žalbi koji se predaje nadležnoj izbornoj komisiji.

U konkretnom slučaju žalbu je izjavila organizaciona jedinica političkog subjekta Srpske demokratske stranke, kojoj prema citiranoj zakonskoj odredbi ne pripada pravo samostalne zaštite povrijeđenog izbornog prava, budući da ta zaštita pripada samo političkom subjektu.

Nadalje, izjavljeni pravni lijek ne može se smatrati žalbom političkog subjekta, jer je nije potpisalo lice koje je primjenom zakonskih odredbi ovlašteno za potpisivanje žalbe u ime političkog subjekta, niti potpisnik u skladu sa Uputstvom, ima deponovan potpis kao ovlašteni predstavnik političke stranke za izjavljivanje žalbe.

Na osnovu iznesenih utvrđenja apelaciono vijeće zaključilo je da žalba nedopuštena u smislu člana 180 stav 3 Zakona o parničnom postupku pred Sudom BiH (Sl. glasnik BiH br. 36/04 sa izmjenama), te je primjenom člana 191 stav 1 tačka 1 citiranog zakona žalba odbačena, a odredbe kojeg zakona se shodno primjenjuju kako je to propisano članom 60 a) Zakona o upravnim sporovima Bosne i Hercegovine (Sl. glasnik BiH broj 19/02 do 83/08).

**PREDSJEDNIK VIJEĆA
S U D I J A**

Sreto Crnjak